

Athör cī Paulo gät kōc pan Galatia

Wet nom

Tewēn cī ke wet puōth yam ye kōc jam wet Jethu jōk bī piōōc, acī kōc cie kōc Itharel ben nhiaar. Ku wet yen cī ben ben nhial ē lōn nadē ke lōŋ Mothith yen bī dhiel theek rin bī raan jal a Krīthian. Ku ē yen kē cī Paulo ben a jam wet cīi yen ē yic, rin wet tōŋ ē yic, ee pīr la yic gam Jethu, yen bī kōc rēer thīn ēbēn ke Nhialic. Ku kam kōc cī gam pan Galatia, pan mēc kōc Roma Athia cōk ciēēn, kōc kōk ke cī ben thīn aacī Paulo ben aa jōōny. Ku yekē lueel lōn dhil raan Lōŋ Mothith theek bī jal a raan path ke Nhialic.

Paulo aca athör kēnē gōt bī gam la cōk dhuōk ciēēn bī kōc cī wel nhiim cī piōōc ē lueth cōl aloi yic. Acī kaŋ nyuōth ke lōn le yen yic, bī ya cōl atuny Jethu Krītho. Acī det yic ke lōn wet ye yen cōl atuuc abō tēnē Nhialic, acie riel ē raan, ku luōnde tēnē kōc cie kōc Itharel ē rōt. Tēen, yen acī yen wetde deet yic, lōn ee gam ē rot yen ē kōc cōl aala cōk tēnē Nhialic. Acī nyuōth welke cōk ciēēn, lōn ciēeŋ path kōc cī gam ē cāth bī kōc cath atheer kek nhiēr, ku gam ben bei tēnē Raan cī lōc ku dōc.

Käk tō thīn

Muōth tueŋ 1:1-10

Riel Paulo ye yen ke atuuc 1:11-2:21

Athör dhēēŋ ē Nhialic 3:1-4:31

Lääu nom ku luoi kōc cī gam 5:1-6:10

Thök ē wēl 6:11-18

1 ¹ Yen Paulo, wäär kueny Jethu kek Nhialic ba ya atuny Jethu wäär cī Wun Nhialic jōt bei raŋ yic. Acie raan ē path yen kuany ya ba ya atuny Jethu. ² Yen yok miethakāi cī gam reer kek ya ē ten, yok aa get we athör kēnē buk wek akuut kōc cī gam pan Galatia muōōth ēbēn.

³ Bī Nhialic Wāda kek Bānyda Jethu Krītho we gām dōōr ku athieiden.

⁴ Rin bī yen yo luōny bei lēeŋ kēnē yic, Raan cī lōc ku dōc acī thou rin adumuōōmkua rin theek yen Wāda Nhialic. ⁵ Bī Nhialic aleec akōlriēēc ēbēn. Yenakan.

Wet Puōth Yam

⁶ Kē cāk looi acā gōi apeidit. Kam thīn yen cī wek guō jāl raan wäär cōl we aa ril cōk, Bānyda Jethu. Ku yakē gam piōōc det yakē cōl aye Wet Puōth Yam wēl athör kōk.^a ⁷ Ku yeen acie Wet Puōth Yam acin. Ku wet lueel yen ye kēlä, ē rin ala kōc kōk wic ye bik kōc la liāp nhiim, ku wickē bik athör wēl Jethu waar yiic. ⁸ Na cōk atuny Nhialic, nadē ke ye yo, yok piōōc kē cīi thōŋ kek athör wēl Jethu wäär cuk piōōc tēnē we, ke diet Nhialic nāk raan kē cit kēnē looi ku cuet mēec. ⁹ Acuk kaŋ lueel, ku abuk ben ber yic emēn, na le raan piōōc we wēl cīi thōŋ kek wēl cāk gam theer, ke diet Nhialic cōl anāk raan kēnē ku cuet mēec.

¹⁰ Ye ciet aleec ē raan yen wiēc emēn? Acie ye, kē wiēc aleec Nhialic. Ye lōn bī ya piŋ raan ēbēn? Na ya ŋoot ke ya them ba looi kēya, ŋuōt yen acie alony ē Jethu.

Paulo acī Nhialic cōl

¹¹ Calkē alek we miethakāi cī gam, wet Jethu ya piōōc tēnē we acie wet raan ē path. ¹² Acā yōk tēnē raan ē path, ku acie raan ē path yen piōōc yen ē wēlkā. Ee Jethu nom yen aa nyuth ke ya.

¹³ Acī lek we yen te ciēeŋ yen thīn wäär rēer yen kam kōc Itharel ē lōŋden yic, ku te ye yen kōc cī wet Jethu gam nāk thīn. Ku aca them ba akut kōc cī gam rac. ¹⁴ Acin raan wār ya thek lōŋ Mothith, lōŋ kōc Itharel, ee kōc riēēc kek ya yiic ēbēn. Lōŋ wārkuan dit atheek apei dit.

¹⁵ Nhialic ē dhēeŋde yic, yen ago yen guō kuany ke ya kēc cak dhiēēth, ku cōl yen ba ya aluōnyde, ¹⁶ bī Wēnde cōl anyuth rot ya, ku ba wetde la piōōc tēnē kōc cie kōc Itharel. Acin raan cī yen la tēnē ye bī ya la weet, ¹⁷ nadē ke ya cī la Jeruthalem ba atuuc wäär kek kōŋ la wet Nhialic yic tēnē ya, la tūŋ bik yen la lek kē luōoi. Yen acī la Arebia nyin yic, ku dhuōk Damathkuth. ¹⁸ Yen acī run kadiäk ben la thöl, ku jal dhuk Jeruthalem ba wēl la deet tēnē Pīter. Ku la rēer kek Pīter tecit ten nūn kathiäär ku ŋuan. ¹⁹ Acin atuuc kōk juēc ca ben yōk, ee Jemith menh ē Bānyda Jethu ē rot yen aca ben yōk.

^a1:6 Rin diik Raan cī lōc ku dōc.

²⁰ Kë gät we ë yic. Anjic Nhialic acie lueth yen luæl.

²¹ Nawën ke yen aci ben la beei kök yiic pan Thiria ku pan Cilicia. ²² Ye ninkä koc akut koc ci gam pan Judia aake kuc ya. ²³ Kënë njickë ë këne ye koc kök lueel ëlä, “Mony wäär yo nöc yok koc ci gam, yen apiööc wet wäär wic bi rac emën.” ²⁴ Ku yen aaci kek Nhialic ben leec rin ci yen ya wel puöu ba ya raande.

Paulo ku atuuc kök

2 ¹ Na la ruöön thiäär ku nuan thök ke ya ben la Jeruthalem yok Barnaba, ku luath Tito kek ya. ² Yen a ya la Jeruthalem rin ci Nhialic ye nyuöth ya ba dhiel la. Na la röm ë rot kek koc wat akut ë koc ci gam nom Jeruthalem, ke jal lek ke yen Wet Puöth Yam Jethu ya piöc tene koc cie koc Itharel. Rin aci wic bi ke ca looi theer ku ke luöi ya aköl cien kipuöth yok thin. ³ Raandien wën cath kek ya col Tito, tewën cok yen a raan pan Girik acin raan cie mac thin bi col anot, ⁴ cok a wäär wic koc kök ye bik looi këya. Koc kök aake ye röt looi bik aa koc ci gam, ku keek aake ye röt kuel akut yic ke ye luum, aa wickë bik njic ye nom lääu njö yen reer kek yok, koc ci mat kek Jethu. E wickë bi ya lönj Mothith yen yeku theek. ⁵ Ku rin wic yok ye buk Wet Puöth Yam njiec muk tene we bak yic njic, wetden akëcku ben gam.

⁶ Ku koc wäär kek ye ke col koc wat akut nom, këne a luæl rin acin ke ye waar tene ya, ye kek yija. Nhialic acin raan ye luök wëi, aci koc ye tek yiic, koc röt col kek wat akut nom, acin kök yam cik nyuöth ya. ⁷ Acie këya, acik tin lon ë Nhialic yen aci gam ë luoi këne, ba Wet Puöth Yam nyuöth koc cie koc Itharel, cimën wäär ci Piter kuany bi Wet Puöth Yam la nyuöth koc Itharel. ⁸ Ee riel Nhialic yen aci ya looi ba ya atuuc rin koc cie koc Itharel, cimën wäär ci Piter looi ke ya atuuc tene koc Itharel. ⁹ Jemith, ke Piter ku Joon wäär cit kek koc wat akut nom, acik ben njic lon ë Nhialic yen aci ya gam luoi këne. Aaci yo ben dom cin yen ku Barnaba, ku bi nyooth lon yok aa loi tök ke ke. Ku jolku gam lon yen ku Barnaba, yok aabi luui kek koc cie koc Itharel, ku keek aabi aluui kek koc Itharel. ¹⁰ Kë cik ben thiëc tene yo ë lon buk koc njö nyin akuötden yic aa kony, ku këne yen ë kë nhiaar ba looi.

Paulo aci ke looi Piter maan

¹¹ Tewën rëet Piter Antiök, yen aci ben jai wetde koc nhim ebën rin ci yen awuöc looi awuöc deei koc ebën. ¹² Wäär kec koc ci Jemith ke tooc guo yëet, Piter aye mith kek wamathakua ke ye koc cie koc Itharel, na la kockä yëet, ke Piter tem yethok bi ci ben mith ke ke, rin ci yen guöp riöc koc ye lueel lon koc cie koc Itharel aadhil noot. ¹³ Koc Itharel wäär reer thin aaci ben met Piter cok agut ci Barnaba aci met thin aya, ee luoi kariöc këne yic. ¹⁴ Na wäär la tin lon keek aaci cath dhël la cok dhël Wet Puöth Yam yic, guo lek Piter koc nhim ebën, “Yin ë raan Itharel ku yin reer kek koc cie koc Itharel ke yi cit ke, yenjo ye yin koc cie koc Itharel lek bik pir, pir koc Itharel?”

Koc Itharel ku koc cie koc Itharel aaye gam kony ebën

¹⁵ Ee yic, yok aci dhiëth yo ye koc Itharel, ku yok acie koc thai koc la gup adumuööm, cit te ye ke caal thin. ¹⁶ Ee këya, anjicku lon ë njöth Jethu, yen ë raan col ala cok Nhialic nom, gam ci raan wet Jethu gam yen ë raan col apir Nhialic nom. Ku acie thek lönj theer yen koc cok piny Nhialic nom. Yook aya, acuk gam yen wet Jethu, ku bi Nhialic yo kony buk la cok yenhom. Ku acie thek lönj theer yen bi yo kony, rin acin raan la cok Nhialic nom rin ye yen ke lönj theer theek. ¹⁷ Na yeku them buk la cok Nhialic nom rin ci yok mat kek Jethu, ku yeku gup la adumuööm cimën koc cie koc Itharel, ye këne nyuöth lon ye Jethu ye nhiaar bi raan adumuööm looi? Acie yic. ¹⁸ Na wiëc ba lönj ca rac ben cok, ka ye nyuöth lon yen ë löönj dhoj köth. ¹⁹ Yen a ya pir aya wätheer tecit te wic lönj ye thin. Ku wäär ci yen weer bei ë lönj këne yic, aci rot ben leu ba pir tene Nhialic, ciet ya ci nöc kek Jethu tim ci riü köu. ²⁰ Rin acie yen, yen ben weikie muk. Ee Jethu yen ajol pir yaguöp. Pir pir yen emën, yen apir, pir rin gam ci yen wet Jethu gam, raan nhiaar yen arek abi weike gam rienkie. ²¹ Yen aci jei dhënj ë Nhialic. Ku na raan ye la cok Nhialic nom rin lönj theer, ka nyooth lon Raan ci loc ku doc aci thou ë path.

Lönj, tedë ke ye gam

3 ¹ Koc cin puöth pan Galatia! Yena ci we wel puöth? Ku thon Jethu Kritho tim ci riü köu acak piñ. ² Lekke ya tönj këne, we yok Wëi Nhialic rin ci wek lönj theer theek, aye rin ci wek Wet Puöth Yam gam? ³ Yenjo jol wek cien puöth këlä, bak jock Wëi Nhialic, wiëckë emën bak thöl nom riöldun ë röt? ⁴ Cin ke ci kuat käril cak ke yok waar wegup? Ee yic aala ke ci dhiel looi. ⁵ Ye Nhialic ke dit koc göi looi kamkun, ku gem we weike rin theek lönj Mothith, ku aye rin ci wek ke Wet Puöth Yam piñ ku gamkë?

⁶ Tienkë wädit Abaram, aci lueel athör theer wël Nhialic yic, “Lön cī yen Nhialic gam, ku rin cī yen wet Nhialic gam aci Nhialic ben looi bī la cök yenhom.” ⁷ Aleukë bāk deet yic lön mīth Abaram ayic, aa kōc cī wet Nhialic gam cīmēn wäär cī Abaram ye gam. ⁸ Acī gōt athör theer wël Nhialic yic lön Nhialic abī kōc cie kōc Itharel looi bik la cök yenhom, rin gam cī kek wetde gam. Ke yen athör theer aci Wet Puoth Yam nyuōth Abaram ēlä, “Rienku, Nhialic abī raan wut ēbēn dōc.” ⁹ Abaram aci wet Nhialic gam, go Nhialic dōc. Ku yen tede ēbēn, kuat raan cī Nhialic gam aye dōc cīmēn Abaram.

¹⁰ Kōc lui lōŋ theer, aciēen rac aŋoot panden. Rin aci lueel athör theer wël Nhialic yic ēlä, “Kuat raan cie kē cī lueel lōŋ yic theek ēbēn, atō aciēen rac yic.” ¹¹ Ēmēn aci rot nyuōth lön acīn raan bī la cök Nhialic nom rin lōŋ theer, rin aci athör theer wël Nhialic lueel ēlä, “Ee raan cī Nhialic gam ē rot yen abī pīr la cök yök Nhialic nom.” ¹² Ku lōŋ theer acīn yic gam, tecīt te cī athör theer wël Nhialic ye lueel thīn ēlä, “Raan ye looi kē cī lōŋ lueel ēbēn yen abī pīr.”

¹³ Rin cī Jethu thou rienkua, aci yök wēer bei thou yic, thon yen ye lōŋ lueel, rin aye athör theer wël Nhialic lueel, “Raan cī nōk ku nōk tim nom ē raan cī Nhialic tem awuōc.” ¹⁴ Acī Jethu looi këya, ku bī dōc Nhialic wäär cī lueel ka bī gām Abaram, bī gām kōc cie kōc Itharel aya rin Jethu. Ku rin gamda yen abī yō cōl aa yök Wēi Nhialic wäär cī thōn yen Nhialic.

Lōŋ ku wet cī thōn

¹⁵ Miethakāi cī gam, ee kēn rot looi akōlakōl yen aba thōōŋ, te cī kōc karou nyuc ku gamkē wet tōk ku gätkē athör ku thenykē yic, ka cīn raan ben kē wēn dhoŋ kōu, nadē ke juək thok det kēc ē mat. ¹⁶ Nhialic aci athōnde lek Abaram ku tēnē manhde. Acīi athör theer wël Nhialic ye lueel, “Ka miethke,” Ku wetde yic kōc juēc, aye lueel, “Manh tōk,” Ku manh kēnē yen ē Raan cī lōc ku dōc. ¹⁷ Kē wiēc ba lueel ē kēnē yic, ee lön nadē ke Nhialic aci mat kek Abaram, ku yeen aci ben muk nom apath. Lōŋ wäär gem ruōōn buot kaŋuan ku thiardiäk cök, aci kē cī Nhialic gam kek Abaram bī ben dhoŋ kōu. ¹⁸ Na miōc Nhialic ye gam rin lōŋ, ka cīi ben a kē cī thōn yen lui. Kēya, ee rin wet wäär cī Nhialic thōn wädit Abaram yen aŋem Nhialic kēnē tēnē ye.

¹⁹ Ke yeen, yeŋō kē looi lōŋ? Lōŋ aa met Nhialic thīn, rin bī käreec rōt looi aa nyuōth. Ku bī rēer thīn yet te bī manh bī lōk dhiēeth kuat Abaram yic ben, raan wäär cī Nhialic wet thōn Abaram ē rienke. Lōŋ atuuc ē Nhialic kek aake bīi ye piny, ku gemkē raan cī jāl ben. ²⁰ Ku na ye akut tōk, ke raan tō kam kōc aci ben wīc, Nhialic ē tōk.

Wet looi ē lōŋ

²¹ Cī lōŋ kāk cī Nhialic thōn dhōl yiic? Acie këya rin na kōc pinynhom cī lōŋ yök, lōŋ bī pīr akōlriēc ēbēn beei, diet raan ēbēn aci la cök Nhialic nom rin theek yen lōŋ kēnē. ²² Ku aci gōt athör theer wël Nhialic yic lön pinynhom ēbēn areer riel jōŋrac yic, ke yen wet wäär cī Nhialic lueel ka bī gām kōc rin Jethu, aci gām kōc cī wet Jethu raan cī lōc ku dōc, gam.

²³ Ke gam kēnē kēc yēēt, lōŋ aci yō looi buk ciet kōc cī mac, yet tewäär jōl wet puoth yam rin gam war kōc nyuōth. ²⁴ Ku ē lōŋ yen ē muk kōc yet te bī Raan cī lōc ku dōc ben bī yō ben cök piny Nhialic nom, rin cī yök wetde gam. ²⁵ Ēmēn cī wet Jethu ben ku gamku, lōŋ acie yen ben yō mac.

²⁶ Ee gam yen ē we cōl aaye mīth Nhialic ē tōk kek Jethu raan cī lōc ku dōc. ²⁷ Wek cī muōc nhiim bāk aa tōk kek Jethu. Wek aa cieŋ alanh pīr kek Jethu guōp. ²⁸ Kēya kōc Itharel ku kōc cie kōc Itharel, alony ku raan cie alony, tik ku moc aa thōŋ ēbēn, week ēbēn wek aa tōk, wek cī mat kek Jethu raan cī lōc ku dōc. ²⁹ Na yakē kōc Raan cī lōc ku dōc, ke wek aa mīth Abaram, ku wek aabi kēwäär cī Nhialic thōn Abaram yök.

4 ¹ Kē lueel akīn, manh koor yen bī kāk wun lōk thōn aye jōōr cīmēn alony cōk alōn ē yen ala kāŋ ēbēn. ² Te ŋot koor yen ala kōc kōk ye muk, ku loikē bī kē cīk lueel dhiel apiŋ, yet akōl bī wun ye lueel meth aci dīt alēu bī kākke jal thōn. ³ Ee këya, wäär aya yök aa yō ye alony jak la riel pinynhom, wäär kēc yök yic guō ŋic. ⁴ Na wäär la nīn thōk, go Nhialic Wēnde tuōōc pinynhom. Acī ben kecīt raan bī dhiēeth tik ē path. Ku muk lōŋ kōc Itharel, ⁵ bī kōc ben kuōny bei lōŋ kēnē yic, ku bī nadē ke yō ye mīth Nhialic.

⁶ Rin ye wek mīth Nhialic, Nhialic aci wēi Wēnde tuōōc yōpuōth, ku wēi ē yō cōl adhiu ēlä, “Wä, Wädie.” ⁷ Kēya yīn aci ben alony, yīn ē manhde. Rin ye yīn manh Nhialic, Nhialic abī yī gām kāk ke cī täu miethke.

Paulo anhiar kōc pan Galatia

⁸ Theer wek aa we kuc Nhialic, ku këya wek aa we ye loony jakrec cie Nhialic. ⁹ Ku ēmēn ŋic wek Nhialic tedē aleu ba lueel aya lön Nhialic aŋic we, ye kēdē wīc wek ye bāk dhuk tēnē jakrec niōp wäär mac piny?

Yeņö wic wek ye bäk ben aa loony cimën theer wäär? ¹⁰ Bi ya nin kök kek yakë ke muk nhiim, ke pei ku run aya. ¹¹ Yen aci yic neer we! Lëu bi ya luoi ëbën ca looi tënë we yen cïn wetde yic?

¹² Wek aa liem miethakäi cï gam, calkë röt aa cït ya. Ee yic yen aya, yen acit we. Acin käreec cäk luoi ya. ¹³ Adhielkë muk wenhiim lon wäär piöoc yen wet Jethu tënë we tueņ, ee rin wäär tueeny ya. ¹⁴ Ku na cok a wäär cï tuaanydie we jot puöth, wek aa këc ya ben jai ku cuopkë ya wei. Ee këya, wek aaci yen ben lor cït ya atuny nhial bö pan Nhialic, wek cä ben lor, lur bi wek Jethu raan cï loc ku doc lor. ¹⁵ Wek aa we cï puöth miel! Yeņö cï rot looi? Aleu ba lueel lon lëu wek ye bäk nyienkun njet bei, ku gämke ke ya, te lëu yen rot. ¹⁶ Ca ya raan aterdun ëmën rin cï yen we lek yic?

¹⁷ Kek koc kökkä röt nyuöth bik aa koc nhar we, acie këpath, ee ku bik yen tek yic kek we, ku bäk ke nhar cimën nhieer kek ya. ¹⁸ Ëmën apath akölaköl bäk la nhiër path ke ye yen nhiër la cök, ku këne ë yic, ku acie te rëer yen ke we ë röt. ¹⁹ Miethkie, koc cï gam, aben lek we, kë det cimën tiņ rem yic dhiëth, aya yök yen ë te rëm ya, yet te bi wet Jethu la cök wepuöth. ²⁰ Anhiar ba rëer ke we ëmën, ku ba te ye yen tek thin ë rienkun waar yic. Yen aci yic neer wetdun apei.

Yagär ku Thara

²¹ Calkë röt athieec ëmën, wek koc wic ye bi ya löņ yen yakë theek, kë ye löņ lueel cäk ye piņ? ²² Aye lueel Abaram aa la dhäk karou, dhän tök aye manh tiņ alony, ku tök ke ye manh tiņden cï thiaak cie alony tënë ye. ²³ Dhöņ tiņden alony ecï dhiëth ë path. Ku dhände kek tiņden cï thiaak cie alony, ee Nhialic yen aci ye lueel këya. ²⁴ Käkkä aa lëu bi ke deet kecit kë thöņ kek det ril, diäär karou aatö nyin löņ döör karou yiic. Kë tueņ acit löņ cï Nhialic looi gon Thinai nom, ku keek aa mith tiņ alony yen col Yagär. ²⁵ Tiņ col Yagär yen areer nyin gon Thinai pan Arebia. Alëu bi thöņ aya kek gen Jeruthalem ya aköl, ku koc reer thin aa cït aloony rin löņ. ²⁶ Gen Jeruthalem reer pan Nhialic yen ë gen path la duk ku acit mada. ²⁷ Aye athör theer wël Nhialic lueel ëlä,

“Miet puöu, yin tiņ cïn meth!

Loi lala ku loi kieeu miet ë puöu, yin raan këc areem röm ë dhiëth kaņ yök!

Rin tiņ cï moc puöl yen abi mith juëc dhiëth tenë tiņ reer kek moc.”

²⁸ Ëmën, ke wek miethakäi koc cï gam, wek aa mith Nhialic tecit te wäär cï ye lueel thin cimën Ithäk wäär. ²⁹ Yon theer manh wäär dhiëth ë path aci manh wäär dhiëth riel Nhialic ben baņ, ke yeen athöņ kek ya aköl. ³⁰ Ye athör theer wël Nhialic lueel këde? Aye lueel, “Cuop tiņ alony wei kek wënde, rin manh tiņ alony acii käk wun bi röm kek manh tiņ cie alony.” ³¹ Ee këya miethakäi cï gam, yok aacie mith tiņ alony, yok aa mith tiņ cie alony.

Muökkë lääu nomdun apath

5 ¹ Nom lääu yen ë këda. Ee Jethu raan cï loc ku doc yen aci yo gam nom lääu! Kääckë apath ke we ye koc lääu nhiim, duökkë röt col aben aa loony ë löņ cimën theer.

² Pieņkë! Ee yen Paulo, alek we na calkë röt aņot, ke wetde yic ë lon tënë we kë cï Jethu looi, acin kë cï kuöny we. ³ Wek aa ben lek wet det, acin raan col rot aņot rin theek yen löņ ëbën. ⁴ Koc kök tö kamkun ye them bik la cök Nhialic nom rin theek kek löņ, aa röt tæem wei tënë Raan cï loc ku doc. Aaliu dhëeņ Nhialic yic. ⁵ Rin yook kë nõthku ë lon bi Nhialic yo col aala cök tënë ye, ku ë yen kë tiit yok riel Wëi Nhialic lui gamda yic. ⁶ Rin te cï yok mat kek Raan cï loc ku doc Jethu, ka cie nuöt, nadë ke yo këc noot yen kony yo, kë ril ë gam ye nhiër beei.

⁷ Wek aa we lui apath! Yeņa cï we ben pen thek ë yic? Cï we rac nhiim këde? ⁸ Acie Nhialic raan cï we col yen lui këya. ⁹ “Ee lon koor yen ayumdüt col apiäär,” tecit te ye ye lueel thin. ¹⁰ Ee këya wek noot we njäath apei. Wet pierda ke yo cï röt mat kek Beny, ee we col aņääth yapuöu lon wek acii wenhiim bi waar. Ku yeen, raan yen rec wenhiim, te cok yen a raan yindë ka noot bi Nhialic gam awuöc.

¹¹ Ku tënë yen, miethakäi cï gam, na la tueņ ke ya lueel nuöt apath, ke yeņö yen ben näk yen? Na ye yic, diet kë ya piöoc rin tim cï riü Raan cï loc ku doc, diet akëc ya maan. ¹² Awiëc bi koc we liäap nhiim, röt rac ë röt.

¹³ Ku tënë we miethakäi cï gam, wek aa we cööl bei bäk cii ben ciet aloony löņ theer yic. Ku duökkë këwäär cï wek weer bei löņ theer yic, col amär we bäk aa luui käreec. Calkë aye nhiër kamkun yen mac we.

¹⁴ Rin löön theer ebën aaci ke mat tök yic ëlä, “Nhiar raan det cimën nhiëer yin rot.” ¹⁵ Ku na yakë luui cimën lääi reer roor, bäk röt aa nöck kamkun ë röt, ke ñieckë wenhüim wek aabi röt thöl ë röt.

Wëi Nhialic ë kóc cök puöth

¹⁶ Aye lueel, calkë aye Wëi Nhialic yen we cök nhüim. Ku acie kë wïc guöp yen bäk aa looi. ¹⁷ Rin kë wïc guöp raan acie yen kë wïc Wëi Nhialic, ku kë wïc Wëi Nhialic acie yen ke wïc guöp raan. Käkkä karou aman röt kamken, ku wetde yic ë lön kë wïc ba looi yipuöu acii lëu ba looi. ¹⁸ Na ye Wëi Nhialic yen thel yi, ke yin acii löñ theer ben mac.

¹⁹ Kë ye raan liiu Wëi Nhialic yepuöu looi aye tiñ gei. Ee rot nyuöoth ke rac apei, ku acin yic atheek, ²⁰ te ye Jöñ cï kieet door ku tit, kóc aa röt maan ku aa thör, aa röt til ku diitkë puöth. Aake yiic teek akuut. ²¹ Kóc aa röt maan, ku aa wiet mäü ku bal, kuat käreckä aayekë ke looi. Wek alek ëmën, cimën wäär cï yen we kañ lek, kóc käk cït käkkä looi aacii bi kañ la bääny Nhialic yic.

²² Ku Wëi Nhialic ë kóc gäm nhiër ku miet puöu, ku döör ku pel röt piny, ku lier puöu ku piath ku gam, ²³ ku atheek, ku duut puöu. Acin löñ man käk cït käkkä. ²⁴ Kóc ë Raan cï löc ku döc Jethu, aaci kärec ye guäpken wïc, ku kärec yekë ke nhiaar kepuöth puöl ebën bik liu kegup. ²⁵ Wëi Nhialic aci yo gäm pïr akölrïëc ebën, ku adhil weikua tiit aya. ²⁶ Yok acii dhil nhiam nadë ke yo man röt kamkua, tedë ke yo til röt.

Kony raan det kërac yic

6 ¹ Mith ma cï gam, na le raan yök kamkun ke loi kërac, ke kóc la gam ril kamkun la thin bik cök puöu piny, ku adhil looi ë dhël path. Ku tietkë röt apath bäk cii mer dhelde yic aya. ² Yakë röt kony kamkun, na luöikë këya, ke wek cï löñ Raan cï löc ku döc theek. ³ Na le raan ye tak kamkun lön yen adit kóc ebën, ke yen rot math yetök. ⁴ Raan ebën adhil rot jööny ë rot. Na ye këpath yen cï looi ke jöl many ye, ku cii thöön kek kë cï raan det kañ looi theer. ⁵ Raan ebën abi ya thiëc këden cï looi.

⁶ Kuat raan ye piöc wet Jethu adhil käpuöth tö kek ye rom kek raan piöc ye. ⁷ Duökkë röt ye math ë röt. Duk ye tak lön cii Nhialic yi bi tem awuöc te kuc yin ye. Käpath ku kärec ye raan ke looi aa ye atiit tueñ. ⁸ Na ye raan luui kërac, ke thou yen ayök, ku na looi kë wïc Nhialic, ke Wëi Nhialic abi pïr akölrïëc ebën gäm ye. ⁹ Këya, dukku go dhör luoi käpath, rin na cuk go dhör, ka aköl alöñ käpath aci thiök, buk käpath yök thin. ¹⁰ Ku këlä te lëu yok ye, ke yok aadhil käpath looi tënë kóc ebën, ku jöl aa kóc reer yok ke gam tök yic apei.

Muöth ciëen

¹¹ Tienkë kit dit nyin ya ke göt te gät yen we athör ë ciëendie. ¹² Kóc ye wïc riel bik we col añot, kek aa kóc ye wïc bik röt aa nyuöoth ku yekë nhiam käk ye tiñ guöp yic ë path. Ayekë looi këya rin cii ke bi nöck, rin ye kek ye piöc lön thon Jethu tim cï riü köu yen abi kóc kony ë rot. ¹³ Ayi kóc ye cak ñoot aacii löñ ye theek, awickë bik we ñoot bik nyuöoth lön wek aaci wetden gam. ¹⁴ Ku na ye yen, ke thon Bänyda Jethu Kritho tim cï riü köu yen aye yen nhiam ë rot. Ku rin cï Jethu thou rienkie tim cï riü köu, acä ben wïc ba käk ye looi pinynhom buöoth yiic, ku kóc ë luui käk pinynhom aacii ya nhiar. ¹⁵ Acin kë ye looi te cï raan ñoot nadë ke këc ñoot, kën rot looi ë lön nadë ke yin aci cak cäñ ë yam. ¹⁶ Ku rin kóc pïr wet Jethu bi döör Nhialic ku pel wet piny reer ke ke, ku kóc Nhialic ebën aya.

¹⁷ Thök ë wël, cin raan ben yen luöi aliäap, rin piär reer yaguöp ebën, aa pier ye nyuöoth lön yen alony Jethu.

¹⁸ Bi dhëen Bänyda Jethu raan cï löc ku döc reer ke week ebën, miethakäi cï gam.